

■ TRIBUNA POLITICA

In plebiscit per ina ferma SSR

DA SILVA SEMADENI,
CUSSEGLIERA NAZIUNALA

A la fin finala è stà il resultat fitg cler: 71,6% han ditg na! Per mai è quai stà in enorm levgiament cur ch' il naufragi da la No-Billag è vegnì enconuschent dumengia passada. Ed uss, tut en urden? Na, il temp suentar la No-Billag na vegn betg pli ad esser sco pli baud.

A vant la votaziun han ins discussiunà da plans co che la SSR duai vesair or en l'avegnir. Uss, suentar in resultat uschè cler, fissi ura da vesair las chaussas cun calma. Ma quai na para betg dad esser il cas. Ils aderents da l'iniziativa No-Billag han gia lantschà novas intervenziuns parlamentaras a Berna. Las propostas or da las retschas da la pps vulessan reducir anc dapli las taxas da recepziun u era stritgar questas taxas per tut las interpresas. Questas propostas èn uss dentant obsoletas. La votaziun dals 4 mars ha confermà ch' in franc al di per tut il program da la SSR en tut las quatter linguas naziunalas n'è betg ina expensa exagerada. Davart la contribuziun da las interpresas che profitan era dal servetsch public da radio e televisiun ha decis il pievel gia il 2016. Ma quai ch' ins



ha semnà avant la votaziun vuless ins tuttina racoltar. Il motto: Dagut a dagut fa puz.

I ns spetga dentant era da vart bainvulenta refurmas tar la SSR. Era da questa vart vegnan intervenziuns parlamentaras, schebain che la revisiun da la lescha da medias è gia instradada ed il cussegl federal prepara la nova concessiun da la SSR. Il svilup tecnologic general, il sectur online, las disas digitalas dals giuvens, la concorrenza davart radiotelevisiuns privatas, la crisa tar las medias stampadas, tut questas novas realitads pretendan ina reflexiun da la posiziun da la SSR en la societad, da ses agir, da sia purschida. Uschia vegn la discussiun davart la dumonda tge ch'è il servetsch public a definir la purschida futura da la SSR. E la fin finala vegnan a decider ils mezs finansials

che stattan a disposiziun a la SSR la purschida dal program. Per la Svizra quadrilingua èsi dentant impurtant che la SSR restia ferma, ch' ella cuntinue-schia ad esser in pilaster central dal servetsch public e ch' ella porschia er en il sectur online in offerta independenta e d' auta qualitad professiunala. Quai è il mandat confermà dal pievel svizzer en la votaziun. Il martgà liber sulet na po betg satisfar als basegns da medias en in pajais democratic sco la Svizra, el na po betg satisfar als basegns da las singulas regiuns e da las minoritads.

I l directur da la SSR *Gilles Marchand* ha komunità gia la dumengia saira da la votaziun emprimas refurmas. 100 milliuns francs damain per il program vul dir ch' ins sto evaluar bain nua spargnar. Quai è per la SSR ina schanza da pudair mussar ch' ella è pronta e capabla da sa refurmar er da sasez. Ulteriuras refurmas duain vegnir preparadas bain durant la discussiun per la nova lescha da medias e cun la nova concessiun. Sin acziuns malponderadas sco quellas da la pps san ins desister. 71,6% è in plebiscit per ina ferma SSR. Da quai ston ins tegnair quint.